

Ferm na al proporz

Parolas da la pcd per las votaziuns dals 3 da mars 2013

■ (anr/gc) **Datiers da 100 delegadas e delegads da la Partida cristiandemocratica (pcd) dal Grischun eran preschents ed èn s'exprimids cun 83:4 vuschs per Gieus olimpics 2022 en il Grischun, fertant che cun 91:0 vuschs han ins sbittà l'introducziun dal proporz per eleger il cussegl grond.** En la sala polivalenta a Vaz-sut èn delegadas e delegads vegnids beneventads musicalmain da dus clarinettists e per propi dal president da la pcd, cuss. dals stans *Stefan Engler*, sco era dal parsura communal *Hans Krättli*. Oravant èn vegnidas dadas enconuschentas las parolas che la supranza ha prendì davart trais projects da votaziun: Gea a l'aboliziun dal referendum d'autoritads en il Grischun, na a l'iniziativa federala cunter raffaders, dentant sustegn per la lescha federala da planisaziun spaziala.

In bun agid per la famiglia

La presidenta da la pcd grischuna da las dunnas, *Jeannette Bürgi-Büchel*, dilucidescha il conclus federal pertutgant la politica da famiglia. Da princip vai per obligar la confederaziun da procurar premissas idealas per pudair colliar famiglia e professiun sco era famiglia e scolaziun. Praticamain sa tracti da plazs da tgira en canortas e maisas da mezdi per uffants da geniturs che lavuran. Er il chantun duai sa gidar, ma la confederaziun prenda las mesiras necessarias. I va per cumbatter la misergia en famiglia e rinforzar l'economia tras la contribuziun da las dunnas, e la finala per augmentar il bainstar. – Cun gronda maioritad sustegn la pcd quella mesira a pro da la famiglia.

Per il maiorz – cunter il proporz

Il president da la pcd giuvna dal Grischun, *Reto Cramer*, preschenta ils arguments per mantegnair il sistem da maiorz tar las elecziuns en il cussegl grond ch'ins vul remplazzar cun l'iniziativa en favur dal proporz. La parola dals giuvens cristiandemocrats sa cloma: «Tgaus enstagl partidas» ed è perquai cunter il proporz. Gia per la 7. giada – dapi 1937 – emprovan ins d'introducir



Il parsura da la pcd grischuna cuss. dals chantuns *Stefan Engler*.

FOTO G. CAPAUL

il proporz en il Grischun. Il sistem verent (maiorz) saja pli simpel, cler e transparent.

Deputà *Hans Geisseler* timuna il discurs cuntradictoric cun l'adherent dal maiorz, deputà *Livio Zanetti*, e l'adversari, *Andrea Davaz*. Igl è stà – mintgamai sin dumonda – in barat dad arguments pro e contra. Facit: Il proporz pussibilteschia tschernas pli gistas, fertant ch'il maiorz fetschia pussaivel da tscherner las meglras personalitads. La decisiun per il maiorz e cunter l'iniziativa per il proporz è clera cun 91 na ed insaquantas abstenziuns.

Per gieus olimpics en il Grischun

Il president da la partida, cuss. dals stans, *Stefan Engler*, introducescha ses votum inicial cun mussar in film davart ils Gieus olimpics da 1948 a San Murezzan, ch'èran vegnids averts gist sin il di 65 onns avant. Quai ha fascinà. Era 2022 èn gieus olimpics da far en il Grischun (da

San Murezzan e Tavau anora). I sa tractia d'in project naziunal. El alleghescha la finanziaziun cun divers budgets, ils custs per la segirezza e numna las innovaziuns insatge sco ina ierta per l'avegnir, da durabladad e surtut l'effect e niz economic positiv per l'entir chantun che sa dettian da quel grond sforz.

Sut l'egida da deputà *Hannes Parpan* vegn il project da votaziun (finanziaziun) dals gieus olimpics, che vegn avant il pievel grischun, preschenta cuntradictoricamain. Deputà *Ralf Kollegger* sustegna tant l'engaschi sco la participaziun dal chantun a gieus olimpics, fertant che deputà *Andreas Thöni* suttastitga ils custs enorms e ristgs colliads. El predi ch'il suveran grischun vegnia (puspè) a dir na a gieus olimpics il mars.

L'entusiassem per l'olimpiada è stà persvadent entaifer la pcd. Quella è s'exprimida cun 83:4 vuschs e 5 abstenziuns en favur dal project Gieus olimpics en il Grischun 2022.